

## 1 KORIN CAPAT

### *Zeelnaak Awi*

<sup>1</sup> Khawsa a ngaihnaak amyihna Jesu Khrih a ceityih na ak awm Paul ingkaw ni koeinaa Sosthenas ing, <sup>2</sup> Korin khaw awh ak awm Khawsa a thlangboel ingkaw, Jesu Khrih awh ciimcaih sak na awm nawh ak ciimcaih na awm aham ak khy thlangkhqi, hun hoei awh a mingmih ingkaw ningnih a Boei – ningnih a Bawipa Jesu Khrih ang ming ak khy thlangkhqi boeih a venawh: <sup>3</sup> Pa Khawsa ingkaw Bawipa Jesu Khrih a ven awhkaw qeennaak ingkaw ngaihdingnaak awm seh.

### *Lungnaak Awi*

<sup>4</sup> Jesu Khrih ak coming nangmih a venawh a ni peek khqi am qeennaak awh nangmih aham Khawsa venawh zeelnaak awi kqawn poepa nyng. <sup>5</sup> Amah awh ce nangmih taw ik-oeih soepkep awh boei uhyk ti – awi kqawnaak boeih ingkaw cyihnaak soepkep awh – <sup>6</sup> kaimih ing Khrih akawng ka mik kqawn law ce nangmih awh ce cak hawh hy. <sup>7</sup> Cedawngawh nangmih ing ningnih a Bawipa Jesu Khrih ang dangnaak nyn ce naming lamtoen awh myihla zoepeek kutdo ik-oeih voet hlauhnaak qoe qoe am ta voel uhyk ti. <sup>8</sup> Ningmih a Bawipa Jesu Khrih a kawryn awh nangmih taw coet ak kap na am nami awmnaak aham, amah ing a dyt dyna thaawmnaak ni pek khqi bit kaw. <sup>9</sup> Khawsa capa, ni Bawipa Jesu Khrih khawsaknaak haih a nik khy khqi taw ypawm hy.

### *Korinkhqi Phekbonaak*

<sup>10</sup> Koeinaakhqi, nangmih anglakawh phekbonaak ama awmnaak aham pynoet ingkaw pynoet kawpoek kutoet

na ta unawh kawlung pynoet poeknaak pynoet ing nami cuui aham ni Bawipa Jesu Khrih ang ming ing qeennaak ni thoe h lawk khqi nyng. <sup>11</sup> Koeinaakhqi, nangmih anglakawh oelh qunaak awm hy, tinawh Khalo ipkhui khaw awhkaw thlangkhqi ing qqawn law uhy. <sup>12</sup> Kak qqawn ngaihnaak taw veni: Nangmih anglakawh thlangvang ing, “Kai taw Paul a bawng ni,” ti uhyk ti, thlangvang bai ing, “Kai taw Apollo a bawng ni,” ti uhyk ti, ak chang khqi bai ing, “Kai taw Cepha a bawng ni,” ti uhyk ti, a chang bai ing, “Kai taw Khrih a bawng ni,” ti uhyk ti.

<sup>13</sup> Khrih ve phe k ang bo qunawh nu? Paul aw nangmih aham thinglam aw h a mi tai? Paul ang ming aw h aw baptisma nami huh? <sup>14</sup> Krispa ingkaw Gaia doeng am taw u awm baptisma am ka ni peek khqi a dawngawh zeel nyng. <sup>15</sup> Cedawngawh kai ang ming aw h baptisma ak hu u awm am awm hy. <sup>16</sup> (Oeih, Stefen ipkhui khaw ce baptisma pe bai nyng; cekcoengawh, thlak chang baptisma ka peek ak awm hy voei nu, am sim nyng.) <sup>17</sup> Ikawtih Khrih ing baptisma peek aham amni tyi hy, awithang leek ak khypyi aham ni a ni tyih – thlanghqing a cyihnaak awi ing amni, cawh mantaw Khrih thinglam sai thainaak ce a hqawng na awm hawh kaw.

*Khrih, Khawsa A Cyihnaak Ingkaw Thaawmnaak*

<sup>18</sup> Thinglam awithang taw ak qeeng huikhqi aham qawnaak na awm nawh, hulna ak awm hui ningnihkhqi aham taw Khawsa thaawmnaak na awm hy.

<sup>19</sup> “Thlakcyikhqi a cyihnaak ce hqe kawng nyng saw; kawpoek ak cyikhqi ak poeknaak ce hoet kawng nyng,” tinawh qee hyt awm hawh hy.

<sup>20</sup> Thlakcyi hana nu? Cak qeekung hana nu? Ve khawmdek aw h ak oelhkung ce hana nu? Khawsa ing

khawmdek cyihnaak ce qawnaak tinawh am dang sak nawh nu? <sup>21</sup> Khawsa a cyihnaak ve khawmdek cyihnaak ing ama pha dawngawh amah ce am sim thai hy, qawnaak awi khypyinaak ak coming ak cangnaak thlangkhqi hul na a awmnaak awh Khawsa taw ak kaw zeel hy. <sup>22</sup> Judakhqi ing kawpoek kyi hatnaak ce ngaih uhy, Greekkhqi ing cyihnaak, <sup>23</sup> cehlai ningnih ingtaw Khrih thinglam awi ce nik khypyu uhy: ve ak awi ve Judakhqi ang bahnaak na awm nawh Gentelkhqi a qawnaak na awm hy, <sup>24</sup> cehlai Khawsa ing ak khykhqi aham taw, Juda awm Greek awm, Khrih taw Khawsa ak thaawmnaak na a awm dawngawh, Khawsa a cyihnaak na awm hy. <sup>25</sup> Ikawtih Khawsa a qawnaak taw thlanghqing a cyihnaak anglakawh cyi bet nawh, Khawsa ak tha ama awmnaak taw thlanghqing ak tha awmnaak anglakawh ak tha awm bet hy.

### *Khawsa Doengawh Zoeksangnaak*

<sup>26</sup> Koeinaakhqi, nangmih khy na nami awm awh ikawmyihna nami awm tice poek lah uh. Thlanghqing a huh awhtaw nangmih ak khuiawh thlakcyi khawzah am awm uhyk ti; thlang ak khanawh ak awm khawzah am awm uhyk ti; qypawm ipkhui awh ak awm thlang khawzah am awm bai uhyk ti. <sup>27</sup> Cehlai thlakcyi chah sak aham Khawsa ing khawmdek awh ak qawkhqi ce tyk nawh; tha ak awmkhqi chah sak aham khawmdek awh tha amak awmkhqi ce tyk hy. <sup>28</sup> Ve khawmdek awh ak kaina ak awmkhqi ingkaw thlang ing a thenaak khqi – ik-oeih ak awmkhqi ce hqe aham – <sup>29</sup> u awm a haiawh amang oek qu aham amak awm ik-oeihkhqi ce tyk hy. <sup>30</sup> Anih ak coming nangmih taw Jesu Khrih ak khuiawh awm uhyk ti, anih ce ningnih aham Khawsa ven awhkaw cyihnaak na awm hy – cetaw ningnih aham dyngnaak, ciimnaak ingkaw hulnaak

na awm hy. <sup>31</sup> Cedawngawh, U awm ak oek qu ingtaw Bawipa awh oek qu seh,” tinawh a qee awm hawh hy.

## 2

### *Paul Ak Awikqawn*

<sup>1</sup> Nangmih a venna ka law awh, Koeinaakhqi, pau thainaak, cyihnaak ak sang soeih ing Khawsak awi nangmih a venawh ap khy law pyi nyng. <sup>2</sup> Nangmih a venawh ka awm awh ce Jesu Khrih ingkaw a thinglam awi am awhtaw ikawm sim aham am poek nyng. <sup>3</sup> Nangmih a venna ka law awh tha a awm kaana kqih doe ingkaw thyn doena ni ka law. <sup>4</sup> Kak awih kqawn ingkaw awi ka nik kqawn law peek khqi awm cyihnaak ingkaw thlanghqing ak kawtlaak na ap kqawn nyng, Myihla thaawmnaak ing ni kak kqawn law, <sup>5</sup> nangmih ak cangnaak taw thlanghqing a cyihnaak awh am hang nawh, Khawsa ak thaawmnaak awh ni ang hang hy.

### *Myihla Cyihnaak*

<sup>6</sup> Hqamcakhqi venna taw cyihnaak awi ce kqawn nyng, cehlai khawmdek cyihnaak awi amni, ve khawmdek ukkung ak qeeng hly khqi ak awicyih awm am ni; <sup>7</sup> Khawsa ak awicyih awihyp, thuh na ak awm, ni boeimangnaak a hamna Khawsa ing khawmdek a syn hlan awhkawng a hoep cee hawh awi ni. <sup>8</sup> Cece u khawmdek ukkung pynoet ca ingawm ce a cyihnaak ce am sim uhy, ami sim mantaw boeimangnaak Bawipa ce thinglam awh am tai voei uh.

<sup>9</sup> Cehlai, Mik ing ama huh khawi, haa ing amang zaak khawi ingkaw,  
kawlung ing amak poek khawi ce amah ing a lungnaak thlangkhqi ham

Khawsa ing qoek a bah pe hawh hy.” tinawh qeena awm hy.

<sup>10</sup> Khawsa ing ningnih a venawh amah ang Myihla ak coming dang law sak hawh hy. Myihla ing ik-oeih boeih ce sui hy, Khawsa a koe ak dung soeih awm sui hy. <sup>11</sup> Ak khuiawh thlanghqing myihla awm kaana thlanghqing ak kawpoek ak sim u nu ak awm? Cemyih lawtna Khawsang Myihla kaana u ingawm Khawsa ak poeknaak ce am sim hy. <sup>12</sup> Ningmih ing ve khawmdek myihla amni hu unawh Khawsa ing a zoena a ni peek ce ning zaksimnaak thai aham Khawsa ven awhkaw Myihla ni ni huh uh hy. <sup>13</sup> Ve ni ka mik kqawn hy, thlanghqing a cyih thoemnaak ing a ni cawngpyi am nawh, myihla awitak ce myihla ak awi ing myihla a cawngpyinaak amyihna kqawn unyng.

<sup>14</sup> Myihla amak ta thlang ing Khawsang Myihla a venawh kawng ak law ce am do thai hy, anih aham taw cekkhqi ce qawnaak na awm hy, Myihla ben nakaw na a awm adawngawh, ang zaak na awm am zasim thai hy. <sup>15</sup> Myihla thlang ingtaw a soep hoei sim hy, cehlai anih ce u ingawm am sim thai uhy. <sup>16</sup> U ing nu Khawsak kawlung ce sim nawh anih ce awi ak kqawn peek thai? Cehlai kaimih ingtaw Khrih ak kawlung ta unyng.

### 3

#### *Khrihca Khuiawh Phekbonaak*

<sup>1</sup> Koeinaakhqi, myihlak thlangkhqi venawh awikqawn amyihna nami venawh ap kqawn nyng, cehlai pumsak thlangkhqi venawh kqawn amyih nani kak kqawn hy, Khrih-awh nasen thlangkhqi venna kqawn amyih na. <sup>2</sup> Buh am nawh, suktui ing ni ka ni cawm khqi hun, buh nami ai thai hlan adawngawh; tuhawm am ai thai hlan uhyk ti. <sup>3</sup> Pumsak thlangna awm hun uhyk ti. Naming lakawh yytnaak ingkaw oelh qunaak a awm adawngawh

pumsak thlangna awm unawh khawmdek thlangna am nami awm nawh nu? <sup>4</sup> Pynoet ing, “Kai taw Paul a bawng ni,” pynoet bai ing, “Kai taw Apollo a bawng ni,” nami ti khui pumsak thlangna am nami awm nawh nu?

<sup>5</sup> Apollo ce a u nu? Paul taw a u bai nu? Nangmih ing namik cangnaak thai aham Bawipa ing bibi a peek qip tyihzawihkhqi boeih ni. <sup>6</sup> Kai ing saw nyng, Apollo ing tui syp hy, cehlai ak tai sakkung taw Khawsa ni. <sup>7</sup> Cedawngawh ak sawkung ingkaw ak sypkung ce ikawna am awm hy, Khawsa doeng ing ni, a cawt sak. <sup>8</sup> Ak sawkung ingkaw ak sypkung ang cainaak taw pynoet ni, a ni bibinaak amyihna cekqawi ing zoepiek kutdo ce hu bit kawm nih. <sup>9</sup> Ikawtih kaimih taw Khawsa bibi pyikung na awm unyng saw; nangmih taw Khawsa lo na, Khawsa im na awm uhyk ti.

<sup>10</sup> Khawsam qeennaak ka venawh a ni peeknaak amyihna, im ak sa thai amyihna kai ing lung im khoeng nyng, thlak chang ing ce lungkhoeng aw h im sa hy. Cehlai im ak sakung ing ikawmyihna im a sak tice ngaihta seh. <sup>11</sup> Ikawtih thlang pynoet ing lung a khoeng coeng awhtaw thlak chang ing ce ak khanawh lung ak chang am khoeng thai voel hy, cawhkaw lungkhoeng cetaw Jesu Khrih ni. <sup>12</sup> Ce lungkhoeng ak khanawh u ingawm sui, ngun, lung a phuktlo, thing, cangzing ing im a sak awhtaw, <sup>13</sup> thlang boeih a bibi ce dang kaw. Khawngghi ing dang law sak kaw. Maina dang law sak nawh; ce a mai ing thlang boeih a bibi ce ikawmyih bibi aw tice dang law sak kaw.

<sup>14</sup> U myih awm cawhkaw a im sak ce ang dyih poe awhtaw, zoepiek kutdo ce hu kaw. <sup>15</sup> Cehlai im ce a uih boeih awhtaw hlawng boeih kaw, amah taw loet hly hlai hy, mai kqawng anglakawhkawng ak loet amyihna awm kaw. <sup>16</sup> Khawsang Myihla nangmih ak khuiawh a

awm adawngawh, nangmih taw Khawsa a bawkim na awm uhyk ti, tice am nami sim nawh nu? <sup>17</sup> U ingawm Khawsa a bawkim ce a hqe awhtaw, Khawsa ing anih ce hqe lawt kaw; kawtih Khawsa a bawkim taw ciimcaih hy, cawhkaw bawkim taw nangmih ni.

### *Thlanghqing Cyihnaak*

<sup>18</sup> Na mimah ingkaw na mimah koeh thai qu na uh. Nangmih anglakawh u ingawm tuh tloek awhkaw cyihnaak awh amah ingkaw amah ce thlakcyi na ang ngai qu awhtaw, thlakcyi na a awmnaak aham “thlakqaw” na awm seh. <sup>19</sup> Ikawtih ve khawmdek cyihnaak ve Khawsa mik huh awhtaw qawnaak nani a awm. “Thlakcyikhqi ce a mimah a thainaak awh aawk sak khqi hy,” tinawh qee amyihna, <sup>20</sup> cekcoengawh, Bawipa ing thlakcyikhqi ak poeknaak ve a hqawng a h qap nani a awm hy tice sim hy,” tinawh awm bai hy. <sup>21</sup> Cedawngawh, thlanghqing awh ve ikaw awm oek qu aham am awm hy! Ik-oeih boeih ve nangmih aham ni, <sup>22</sup> Paul awm Apollo awm am awhtaw Cepha awm, khawmdek awm hqingnaak awm thihnaak awm tuh kawkkhqi awm haiben awhkaw khqi awm – nangmih boeih aham ni, <sup>23</sup> nangmih awm Khrih a koena awm u tiksaw Khrih taw Khawsa koena awm hy.

## 4

### *Them Khoem Ypawm*

<sup>1</sup> Cedawngawh ningnih ve Khrih a tyihzawih ingkaw Khawsa ak awihyp ak khoem thlang na thlang ing ning ngai khqi seh. <sup>2</sup> Ik-oeih ak khoemkung taw ypawmna a awm ham ngaih hy. <sup>3</sup> Nangmih am awhtaw thlanghqing awidengnaak ing awi nami ni deng mai mantaw ikaw na awm am poek nyng; kamah ingkaw kamah zani awi am deng qunyng. <sup>4</sup> Kak kawpoek ve caih hlai hy, coet a kap

kaana am awm nyng. Bawipa ing ni kai ve awi a ni deng hy.  
<sup>5</sup> Cedawngawh a tym a pha hlanawh u awm awi koeh deng;  
 Bawipa a law dy qeh uh. Anih ing khawmthan khuiawh  
 thuh na ak awmkhqi ce vangnaak awh dang sak kawmsaw  
 thlanghqing ak kawlung awm dang sak bit kaw. Cawh  
 thlang boeih ing Khawsa am kyihnaak ce hu boeih bit  
 kawm uh.

<sup>6</sup> Tuh koeinaakhqi, “Cawh qee na ak awm ak kep na  
 koeh cet uh,” tinaak awi ce kainih a venawh kawng nami  
 cawngnaak thai aham nangmih nami hawihkhangaak  
 aham ve a ik-oeihkhqi ve kai ingkaw Apollo ing haw na nih  
 nyng. Cawhtaw thlang pynoet ing pynoet ak khanawh am  
 oek qu kaw. <sup>7</sup> U ing nu nangmih ak lawha bet na a ni sai  
 khqi? Am nami huh ak kaa awh ikaw nami taak? Nami  
 huh awhtaw kawtih amak hu amyihna nami zoeksang  
 qu? <sup>8</sup> Nami ngaih ce ta hawh uhyk ti! Nangmih taw boei  
 hawh uhyk ti! Kaimih kaana – sangpahrangkhqi na coeng  
 hawh uhyk ti! Nangmih mi sangpahrang na awm haih  
 aham, sangpahrang na nami awm tang tang ce ni ngaih  
 pyi khqi soeih soeih nyng! <sup>9</sup> Kai ingtaw, thih aham ami  
 toen thlangkhqi amyihna, Khawsa ing kaimih ceityihkhqi  
 ve a dytnaak benawh ni dang sak namih hy, tinawh poek  
 nyng. Khawk khan ingkaw khawmdek boeih a haiawh,  
 khan ceityihkhqi ingkaw thlangkhqi haiawh dan aham  
 kaimih ve ni sai khqi hy. <sup>10</sup> Khrih aham thlakqaw na awm  
 unyng, cehlai nangmih taw Khrih awh cyi uhyk ti! Kaimih  
 taw ka mik tha am awm hy, cehlai nangmih taw namik  
 tha awm hy! <sup>11</sup> Tuh qoe qoe awh ve kaimih taw buh cawi  
 unawh tui ngaih unyng, ak pum a zal na awm unyng,  
 thlang a kut hqitnaak na awm unyng saw im a lo taal  
 unyng. <sup>12</sup> Ka mimah a kut ing bi bi unyng. Thlang ing a ni  
 thekhanaak khqi awh, yh ngah ngah unyng; <sup>13</sup> amak thym  
 na ami nik kqawn awh, kawdungnaak ing hlat pe unyng.



Tuh dy na khawmdek bi bawi amyihna awm unyng saw, khawmdek ing ama ngaih na awm unyng.

*Pa Dyihhun Awh Paul*

<sup>14</sup> Nangmih namik chahnaak aham ve ak ca ve ka qee law amni, ka lungnaak ka cakhqi amyihna ni nami ngaihtaaknaak aham ve ak ca ve qee law nyng. <sup>15</sup> Khrih awh nangmih a nik khoemkungkhqi thlang thonghqa awm ta hlai uhyk ti, pa khawzah am ta uhyk ti, Ikawtih Jesu Khrih awh awithang leek ak coming kai ve nangmih a pa na coeng nyng. <sup>16</sup> Cedawngawh kai ve nami ni oet aham ni ngaih khqi nyng. <sup>17</sup> Ve adawngawh ka lungnaak, ka capa ingkaw thlang ypawm, Timote ce nangmih a venawh tyi law nyng, anih ing Jesu Khrih awh ka khawsak ce khaw a hoei awhkaw Thlangboel a venawh ka cawngpyinaak a amyih ce ni sim sak khqi bit kaw.

<sup>18</sup> Kai, nangmih a ven am kak law hly voel amyihna thlangvang ing oek qu uhy. <sup>19</sup> Cehlai, Bawipa ing tyng hy a ti awhtaw, nangmih a venna law nai kawng nyng, cawh cawhkaw ak oek qukhqi ak awi doeng kaana, a mi bibikhqi ce sim bit kawng. <sup>20</sup> Ikawtih Khawsa qam taw pauthainaak awh am awm nawh thaawmnaak awh ni a awm. <sup>21</sup> Han nu nami ngaih bet? Vyknaak cung ing nu ka law kaw, am awhtaw lungnaak ingkaw kawdungnaak ing nu ka law kaw?

5

*Ak Taai Khrihca*

<sup>1</sup> Nangmih anglakawh nupa thawlhnaak, lukihkhqi venawh za amak awm, a pa a zu ak zunaak awithang za nyng. <sup>2</sup> Nangmih ing kawseet doena cemyihna ak awm thlang ce ak chang na nami hqek aham awm hlai hy, cehlai

nangmih ing oek qu na lat uhyk ti? <sup>3</sup> Nangmih a venawh pumsa ingtaw am awm hlai nyng, myihla ingtaw nangmih a venawh awm nyng. Kamah kak awm a mih qoe qoe na, kai ingtaw cemyihna ak awm ak thlang ce awi deng hawh nyng. <sup>4</sup> Bawipa Jesu ang ming ing nangmih kutoet na naming cun awh kai awm myihla ingtaw awm lawt nyng, ningnih a Bawipa Jesu ak thaawnnaak awm cawh awm hy, <sup>5</sup> pumsa thawlhnaak ce hqe na awm nawh Bawipa a khawngghi awh ang myihla ce hul na a awmnaak thai aham, ce ak thlang ce Setan a venawh pe uh. <sup>6</sup> Nangmih naming oek qu paqap ve am nep hy. Hen vetehca ing phaihpi a cuna zam hy tice am nami sim nawh nu? <sup>7</sup> Hen amak bawi phaihpi ak thai na nami awm amyihna, hen ak kqym ce khawng lah uh. Ikawtih Khrih, ningnih a cehtaak poei tuuca ce hyih na hluut hawh uhy. <sup>8</sup> Cedawngawh henpak khqym, seetnaak ingkaw thawlhnaak henpa ing poei sai kana taknaak ingkaw thymnaak phaipi, hen amak bawi ing poei sai u sih.

<sup>9</sup> Nu pa thawlhnaak ak saikhqi mi am naming pha qu aham ni qee law pek khqi hawh nyng - <sup>10</sup> nu pa thawlhnaak ak saikhqi ingkaw ak kamvaa thlangkhqi, thlang a sa ai ak ngaihkhqi, myiqawl ak bawk ve khawmdek thlangkhqi mi koeh pha qu law qoe qoe uh am ti nyng. Cemyihna a awm mantaw ve khawmdek ve nami cehtaak aham awm kaw. <sup>11</sup> Nangmih a venawh ca ka qee law ngaihnaak taw koeinaa na awm nyng ti hlai hy nu pa thawlhnaak ak sai, ak kamvaa, myiqawl ak bawk, thlang ak theet, zu ak aw ingkaw thlang a sa ai ak ngaih ak thlang ceni kak kqawn hy. Cemyih ak thlangkhqi mi ce buh awm koeh ai law haih uh. <sup>12</sup> Thlangboel a leengna ak awmkhqi awideng aham kai ing ikaw a seng? Ak khuiawh ak awmkhqi ce nangmih ing awi nami deng aham am awm nawh nu? <sup>13</sup> A leengna ak awmkhqi taw Khawsa ing awi

deng kaw, “Nangmih anglakawhkaw thlak thawlh ce a leengna khawng uh,” ti bit kaw.

## 6

### *Khrihca Khuiawh Dymnaak*

<sup>1</sup> Naming lakawh pynoet ingkaw pynoet awipungnaak a awm awhtaw, thlak ciimkhqi haiawh kqawn anglakawh Khawsa amak sim awi dengkung a venna namik kqawn hly ngam nawh nu? <sup>2</sup> Thlak ciimkhqi ing khawmdek ve awi deng kaw, tice am nami sim nawh nu? Khawmdek ve awi deng aham nami awm awhtaw, ik-oeih ak zawica aw h awm awi am nami deng kawm nu? <sup>3</sup> Khan ceity-ihkhqi zani awi ni deng kaw, tice am nami sim nawh nu? Ve khawmdek hqingnaak ik-oeihkhqi ak khqoet awhtaw ikawmyih dyna nu awi ni dengnaak kaw? <sup>4</sup> Cemyih a dawngawh nangmih anglakawh awipungnaak a awm awhtaw, thlangboel ak khuiawh ak zawi khyt na ak awmkhqi awm nangmih aham awi ak tlyk kungna ta uh! <sup>5</sup> Nangmih namik chahnaak aham ve ak awi ve kqawn nyng. Nangmih anglakawh awipungnaak ak sit sak thai thlakcyi u awm am awm nawh nu? <sup>6</sup> Cemyih kaana, koeinaa pynoet ing ak chang pynoet ce taza a cawi mantaw – cawhtaw cangnaak amak takhqi haiawh dyihna awm hawh kaw!

<sup>7</sup> Taza cawinaak aw h nami ceh dawngawh lamma na dawk oepchoeh hawh uhyk ti. Ikawtih aw dawk am nami hul mai? Ikawtih thainaak ce am nami zawk mai hy voei?

<sup>8</sup> Na mimah ing thlang thai na lat unawh amak thym ik-oeih ce sai uhyk ti, nami koeinaakhqi venawh cemyihna ce sai uhyk ti.

<sup>9</sup> Thlak thawlh ing Khawsa qam am pang thai kaw tice am nami sim nawh nu? Thai lat na koeh awm uh ee: nu pa thawlh sainaak, myiqawl bawknaak, pa pum zawihnaak,

pa ingkaw pa thawlh sainaak, <sup>10</sup> quuknaak, kamvaanaak, zu quinaak, thlang theetnaak, thlang a sa ai ngaihnaak vemyih ak sai thlangkhqi boeih ing Khawsa qam am pang thai kaw. <sup>11</sup> Cemyihna maw nangmih anglakawhkaw thlang pynoet ingtaw nami awm mah hy. Cehlai nangmih taw ningnih a Khawsa ang Myihla ak coming Bawipa Jesu Khrih ang ming aw h silhna awm hawh uhyk ti, dyng sak na awm hawh uhyk ti.

### *Nupa Thawlhnaak*

<sup>12</sup> A hoei sai ve ka hamna ciimcaih hy, cehlai a hoei sai ve am leek boeih hy; a hoei sai ve ka hamna ciimcaih hy; cehlai ikaw tamnaa na awm pek qu am ngaih nyng. <sup>13</sup> Buh ve phoen a hamna awm nawh phoen awm buh a hamna awm hy. Cehlai Khawsa ing cekqawi ce hqe haih kaw. Pum ve nu pa thawlh sainaak aham amni, Bawipa ham ni, Bawipa awm pum aham ni. <sup>14</sup> Khawsa ing ak thaawmnaak ing Bawipa ce thihnaak awhkawng thawh hy, ningnih awm nim thawh khqi lawt kaw. <sup>15</sup> Nangmih a pum taw Khrih amah a pangkhqi ni tice am nami sim nawh nu? Khrih a pang ce lo nyng saw pum ak zawikhqi ing ka tawm hly nawh nu? Amni! <sup>16</sup> Pum ak zawi nu ing anik awm haih taw pum ak zawi nu ing pum pynoet na awm hawh hy tice am na sim nawh nu? “Pakkih ce pumoet na coeng hawh kaw, a ti amyihna. <sup>17</sup> Cedawngawh u awm Khrih ingqawi a nik pha qu taw myihla aw h pum pynoet na awm hy nih. <sup>18</sup> Nu pa thawlh sainaak ce cen taak uh. Thlang ing ak chang thawlhnaak a saikhqi boeih taw a pum a leeng benawh kaw ni, cehlai u awm nu pa thawlhnaak ak sai taw amah a pum aw h thawlhnaak ak sai na awm hy. <sup>19</sup> Nangmih a pum taw, Khawsa venawh kaw nami huh a dawngawh nangmih ak khuiawh ak awm Ciim Myihla a bawkim ni tice am nami sim nawh nu? Nangmih

ve na mimah a koe na am awm uhyk ti; <sup>20</sup> nangmih taw a phu ing thlaih na namik awm ni. Cedawngawh nami pum ing Khawsa ce zoeksang lah uh.

## 7

### *Zu Lawh Va Taak Kawng*

<sup>1</sup> Nangmih ing ca nami qee lawnaak akawng awh: Pa ing a zu ama lawh aham nep hy. <sup>2</sup> Cehlai cemyihna nu pa thawlhnaak a awm dawngawh, thlang boeih ing zu ta boeih seh, nu boeih boeih ing vaa ta boeih seh nyng. <sup>3</sup> Pa ing a zu venawh chungva na a awmnaak ce soep sak seitaw, zu ingawm a vaa a venawh soep sak seh. <sup>4</sup> Zu ing a pum ce amah doeng am koe na hy, a vaa ing ni a koe naak hy. Cemyih lawtna, vaa ing awm amah a pum ce am koe na hy, a zu ing ni a koe naak hy. <sup>5</sup> Cykcahnaak ham a tym a khoeh hawnaak a awm kaana amah doeng a ngaihnaak doek khoeih ce koeh sai law uh. Am nang yh thainaak ce Setan ing haw na nawh nang ce ama ni syknaak thai aham kutoet na awm haih uh. <sup>6</sup> Nangmih ing nami do aham ni kak kqawn, awipeek amyihna am kqawn nyng. <sup>7</sup> Pa boeih boeih ve kai amyihna awm lawt lah voei uh ti ngaih nyng. Cehlai thlang boeih ing Khawsa a kutdo ce ta qip qip lawt uhy; pynoet ing ak chang ta nawh pynoet bai ing ak chang ta bai hy.

<sup>8</sup> Zu amak lo ingkaw vaa amak takhqi ingkaw nuhaikhqi venawh: kai amyihna zu lawh vaa taak kaa qoe na a mi awm lawt aham ngaih nyng. <sup>9</sup> Cehlai ama ming yh thai awhtaw, zu a mi lawh vaa a mi taak aham awm hy, yh tloei anglakawhtaw zu lawh vaa taak ce nep bet hy. <sup>10</sup> Zu ak lo vaa ak takhqi venawh (kai ing am nawh, Bawipa ing) ve ak awi ve ni pek khqi hy: a zu ing a vaa ce koeh ma seh. <sup>11</sup> A vaa ce ama awhtaw vak chang koeh ta voel seh, am

awhtaw a vaa ce pan tlaih seh. A vaa ingawm a zu ce koeh thla seh.

<sup>12</sup> Ak chang bai taw (Bawipa ing am nawh, kamah ing ni kak kqawn hy): Koeinaa thlang pynoet ing amak cangnaak thlang ce zu na mai nawh cawhkaw nu ing a vaa ing awm poe aham a ngaih awhtaw, a zu ce thlak aham am awm hy. <sup>13</sup> Nu pynoet ing amak cangnaak thlang pynoet ce va na nawh cawhkaw pa ing a zu ingqawi awm poe aham a ngaih awhtaw, ce nu ing ce koeh ma seh nyng. <sup>14</sup> Amak cangnaak pa ce a zu ak coming ciim sak na awm hawh hy, amak cangnaak nu awm cangnaak ak ta a vaa ak coming ciimcaih sak na awm hy. Cemyih am mantaw nami cakhqi ce am ciimcaih kaw, cehlai cemyihna a awm dawngawh ciimcaih hly hy. <sup>15</sup> Cehlai cangnaak amak ta ing a cehtaak awhtaw, cehtaak mai seh. Cangnaak ak ta pa am awhtaw nu ce cemyih ing am pin hy; Khawsa ing qoep ang qui cana awm aham ni a nik khy khqi. <sup>16</sup> Nu nang, na vaa hul kawng nyng tice ikawmyihna na sim naak? Pa nang, na zu hul kawng tice ikawmyihna na sim naak?

<sup>17</sup> Khawsa ing khy nawh Bawipa ing bibi a peeknaak awhtaw thlang boeih ing a hqing khuiawh awm u seh nyng. Ve ve thlangboel boeih a venawh ka peek awi na awm hy. <sup>18</sup> Khy na ak awm pa ce chahhui qeet ce hawh nu? Chahhui amak qeet thlang myihma koeh awm seh. Chahhui qet kana ak awm khy ak awm hly nu? Anih ce chahhui a qeet aham am awm hy. <sup>19</sup> Chahhui qeet awm ama qeet awm ikawna am awm hy. Khawsa ak awipeek khoem ce ni awipui bet hy. <sup>20</sup> Khawsa ing ak khynaak amyihna thlang boeih ing amah a awmnaak hun awhtaw awm seh. <sup>21</sup> Khyna na awm awhtaw tamnaa na nu na awm? Ce ing ce kawpoek kyinaak koeh ni pe seh, na loetnaak ham a tym leek na huh awhtaw cawn taak ham cai. <sup>22</sup> Bawipa ing ak khy awhtaw tamnaa na ak awm ce Bawipa awhtaw ak loet thlang

na awm hy; cemyih lawtna, khy awh loet na ak awm ce Bawipa a tamnaa na awm hy. <sup>23</sup> Nangmih taw a phu ing thlaih na awm u hyk ti; thlang a tamnaa na koeh awm uh. <sup>24</sup> Koeinaakhqi thlang boeih ing Khawsa venawh sai aham bibi ami taak boeih boeih amyihna, Khawsa ing ak khynaak amyihna awm boeih u seh nyng.

### *Thlak Hoeng Ingkaw Nu Hai*

<sup>25</sup> Nulaa cadawngkhqi akawng awhtaw; Bawipa a ven awhkaw awipeek taw am hu pai hlai nyng, Bawipa am qeenaak awh ypawm na ka awm amyihna kai ing awi ni pek khqi nyng. <sup>26</sup> Tuh tloek awhkaw kyinaak awh ve, tuh awhkaw nami awm amyihna nami awm poe ce nep hy tinawh poek nyng. <sup>27</sup> Zu nak lo vaa nak ta hawh nu? Cawhtaw koeh pek qu voel uh. Zu nak lo va nak ta hlan hyn nu? Cawhtaw na zu koeh lo voel. <sup>28</sup> Zu na lawh hawh awhtaw, ce ce thawlhnaak amni; nulaa ingawm vaa a taak awhtaw am thawlh hy. Cehlai zu ak lo vaa ak takhqi taw ve hqing khui khawsaknaak awh kyinaak hu kawm uh, cedawngawh kai ingtaw ciimcaih sak aham ni ngaih khqi nyng.

<sup>29</sup> Koeinaakhqi, kak kqawn ngaihnaak taw, a tym tawi hawh hy tive ni. Tuh awhkawng zu ak takhqi ing zu amak tamyihna a mi awm aham awm hy; <sup>30</sup> ak khy ak kqangkhqi ing, amak khy amak kqang amyihna; ak awmhlykhqi ing amak awmhly amyihna; ak thlaikhqi ing amah ta amyihna; <sup>31</sup> Khawmdek them ak hawnaakhqi ing ce a them awh ce kawlung koeh pe u seh. Ikawtih ve khawmdek awhkaw khqi ve khum boeih kaw.

<sup>32</sup> Nangmih ly doena nami awm ham am ngaih nyng. Zu amak taa ing Bawipa benawh ly seh nyng, ikawmyihna Bawipa ce a zeel sak hly thai, tice poek seh. <sup>33</sup> Zu ak ta ingtaw, ikawmyihna nu ka zu ce ka zeel sak thai lah voei,

tinawh ve khawmdek them awh ly seh. <sup>34</sup> Vaa amak taa nu, am awhtaw nulaa ingtaw Bawipa ben them ce poek hy: ang cainaak taw Bawipa aw h apum ingkaw myihla pe bawk hy. Cehlai vaa ak ta nu ingtaw ikawmyihna nu ka vaa ka zeel sak thainaak lah voei, ati aw h ve khawmdek them aw h lynaak tahy. <sup>35</sup> Nangmih nami leeknaak aham ni ve ve kak kqawn hy, nangmih ka nik bymnaak khqi aham amni, khawsak ak leekna khaw nami sak naak thai ham ingkaw Bawipa bi ce ngaih aa kana nami binaak thai ham ni ka kqawn hy.

<sup>36</sup> U ingawm a canu nula, vataak kana khawqyt a awm sak akawngawh ak mak thymna ang ngaih qu awhtaw, anih taw thlang hoengna awm nawh, a ngaih awhtaw, a sai ngaih ce sai seh; ang thawlh hy; taak sak seh nyng. <sup>37</sup> Cehlai pa ing ak kaw poek nawh, u a ceainaak awm a awm kaana yhthainaak a taak dawngawh, nulaa ce ama zunaak aham ak poek awhtaw – ce awm ak thym ni a sai. <sup>38</sup> Cedawngawh, nulaa ak zunaak ce thym hy, Cehlai zu amak lo ce nep bet hy. <sup>39</sup> Vaa ak ta nu taw a vaa a hqing khui pinna ak awm ni. Cehlai a vaa a thih awhtaw thlang a ngaih ce vaa na thai hy, Cehlai a vaa ce Bawipak thlang na a awm ham awm hy. <sup>40</sup> Ce a nu ce a awm khawi amyihna a awm mantaw zeel bet kaw, tinawh poek nyng, kai awm Bawipa Myihla ce ta nyng tinawh poek qu nyng.

## 8

### *Myiqawl Bulnaak Buh An*

<sup>1</sup> Tuh myiqawl a venawh bulnaak awk a ai akawng kqawn lah sih: cyihnaak ni ta boeih uhy tice ni sim uhy. Cyihnaak ve oek qu poepa hy, cehlai lungnaak ingtaw taai sak hy. <sup>2</sup> Sim hawh nyng ak ti ing a sim hly kawi ce sim tang tang hlan hyn hy. <sup>3</sup> Cehlai Khawsa ak lungnaak thlang taw Khawsa ing anih ce sim hy.



<sup>4</sup> Cawhtaw, myiqawl bawknaak awh bulnaak na ami nawn buh a an awh: Khawmdek awh myiqawl bawknaak ve kawna awm am awm nawh Khawsa awm pynoet doeng ni a awm, tice ni sim uhy. <sup>5</sup> Ikawtih khawmdek ingkaw khawk khan awh khawsa tinawh amik khy awm hlai hy (“khawsa” khawzah awm nawh “Bawipa” khawzah awm pai hlai hy) <sup>6</sup> ningnih aham taw Khawsa pynoet doeng ni a awm, anih taw Pa, anih a ven awhkawng ik-oeih boeih ce law nawh anih aham ningnih ve ni hqing uhy, Bawipa awm pynoet doeng ni a awm, anih taw Jesu Khrih ni, anih ak coming ik-oeih boeih law nawh, anih ak coming ningnih awm ni awm uhy.

<sup>7</sup> Cehlai u ingawm ve ve am sim hy. Thlang pynoet taw myiqawl bawknaak ce ak kaww khuiawh a awm hyn dawngawh bulnaak buh a an ami ai awh ce, a mik kawpoek tha ama awm dawngawh, amak ciimcaih na awm hawh hy. <sup>8</sup> Cehlai awk a ai ing Khawsa venna amni khyn hy; ni ai a dawngawh am ni se bet nawh, amni ai dawngawh awm amni leek bet bai hy. <sup>9</sup> Cehlai na ngaihdingnaak ce tha amak awm khqing bahnaak na ama awm thainaak aham ngaihta lah uh. <sup>10</sup> Nangmih vawhkaw cyihnaak ak takhqi ing myiqawl bawknaak bawkim awhkaw awk a ai nami ai ce poeknaak thai amak ta thlang ing a ni huh awhtaw, myiqawl bawknaak awhkaw bulnaak buh a an ce ai ngaihnaak kawlung am ta hly nawh nu?

<sup>11</sup> Nang a cyihnaak ing, vawhkaw tha amak awm koeinaa, Khrih ing anih aham thi hlai hy, him hawh hy. <sup>12</sup> Vemyihna koeinaa ak khanawh na thawlh awh cekkhqi a simnaak tha amak awm ce maa sak hawh hyk ti, cedawngawh Khrih ak khanawh thawlh hawh hyk ti. <sup>13</sup> Cedawngawh, ka awk ai ing ka koeinaa ce thawlh awh kang tluuk sak awhtaw, anih ce am kang tluuk saknaak aham ityk awh awm meh am ai voel kawng nyng.

## 9

*Ceityih A Saithainaak*

<sup>1</sup> Ngaihding ak thlang na am ka awm nawh nu? Ceityih pynoet am kang ming na nawh nu? Ningmih a Bawipa Jesu ce am ka hu nawh nu? Nangmih ve Bawipa awh kai a bibinaak ak thaih khqi am nu? <sup>2</sup> Thlak chang a venawh ceityih na am awm mai nyng seiawm, nangmih a ven awhtaw awm nyng! Bawipa awh nangmih ve ceityihna ka awmnaak ak dang sakkung na awm uhyk ti. <sup>3</sup> Kai awi anik deng khqi venawh ve ve kang hulqunaak na awm hy. <sup>4</sup> Aawk thai ai thainaak ni ta uhy ka ti my? <sup>5</sup> Cangnaak ak ta ni zukhqi awm ceityih ak changkhqi ingkaw Bawipa a naakhqi ingkaw Cepha amyihna khawlawng ni ceh pyi thai lawt hy ka ti? <sup>6</sup> Kai ingkaw Barnaba doeng ing nu phoen khuutnaak na bi ka ni bi hly?

<sup>7</sup> U ing nu amah a tangka ing qalkap bi a bi? U ing nu misur thing ling nawh ai kaana a awm? U ing nu vaitaw khoem nawh a suuktui aawk kaana a awm? <sup>8</sup> Thlanghqing a huhnaak mai awh nu ve ve kak kqawn? Anaa awi ingawm ce ni ak kqawn ka ti my? <sup>9</sup> Mosi a anaa awi awh vemyihna qee hy: “Caang ak leh vaaitaw ce a hui koeh pin pe,” ti nawh. Khawsa ing vaitaw ham doeng nu ak poek pek? <sup>10</sup> Ningnih a ham doeng na ak kqawn law am nu? Oeih, ningnih aham qeena awm hy: dek ak naawkkung ing dek naawk nawh caang ak lehkung ing caang a leh awh, caang ce ang ngaih-u lawt dawngawh cemyihna ce bibi lawt hy. <sup>11</sup> Nangmih anglakawh myihla ben camci ce ka mi saw dawngawh, nangmih a ven awhkawng khawmdek ik-oeih ka mi ah ce doem aih nawh nu? <sup>12</sup> Thlak chang ing nangmih a venawh kawng bawmnaak ce ami huh awhtaw, kaimih ingtaw khawzah khqoet am ka mik hu hly nu?

Cehlai vawhkaw anaa ve am haw na unyng. Khrih ak awithang leek kangna ama awmnaak a ham ikawm yh ngah ngah unyng. <sup>13</sup> Bawkim aw h bi ak bikhqi ing bawkim aw h kawng buh hu unawh, bawkthang aw h bi ak bikhqi ingawm bawkthang aw h kaw am i pek khqi ce bawn lawt uhy tice am nami sim nawh nu? <sup>14</sup> Cemyih lawtna, awithang leek ak khypyikhqi ing awithang leek khypyinaak ak coming ak phoen khuut aham Bawipa ing taak pek khqi hy.

<sup>15</sup> Cehlai vemyih saithainaak ve pynoet awm am haw na nyng. Kak khanawh cemyihna nami sainaak a ham ve ak ca awm am qee law nyng. Vawhkaw kang oekqunaak ve thlang ing kawna a sui kaana a awmnaak anglakawhtaw ka thih leek hly bet hy. <sup>16</sup> Cehlai awithang leek kak khypyi aw h, awithang leek khypyi qoe qoe aham ka awm dawngawh am kyih qu thai nyng. Awithang leek am kak khypyi awhtaw kai aham khaw na bin hy! <sup>17</sup> Kamah ak thahlynaak ing awithang leek ve kak khypyi mantaw, kutdo hu kawng; thahlynaak ing am kak khypyi mantaw, ka venawh peek na ak awm ce kak khypyi mailai na awm hy. <sup>18</sup> Cemyih a awm mantaw kai aham ikaw kutdo a awm kaw? Ve mai ni: awithang leek kak khypyinaak ve a zoe na ni, cedawngawh ka saithainaak ce awithang leek khypyinaak aw h am haw na nyng.

<sup>19</sup> U a tyihzawih na awm am awm nyng saw ngaihding na awm hlai nyng, thlang khawzah ka lawhnaak thai aham thlang boeih a tamnaa na sai qu nyng. <sup>20</sup> Judakhqi venawh Judakhqi ka ka lawhnaak thai aham Juda na awm nyng. Anaa ak kaiawh ak awmkhqi venawh (kamah taw anaa ak kaiawh ak awmkhqi venawh anaa ak kaiawh am awm hlai nyng), anaa ak kaiawh ak awmkhqi ce ka lawhnaak thai aham, anaa ak kaiawh ak awm amyihna awm lawt nyng. <sup>21</sup> Anaa awi amak ta thlangkhqi venawh anaa awi amak

ta myihna awm lawt nyng (Khawsa anaa awhkawng am loet nyng saw Khrih a anaa ak kaiawh awm nyng), cawh ni anaa awi amak ta thlangkhqi ce ka lawh hly thai. <sup>22</sup> Tha amak awm thlangkhqi venawh, tha amak awmkhqi ce ka lawhnaak thai aham, tha amak awm thlang na awm nyng. Ang coengnaak thai khuina thlang ka hulnaak thai aham, thlang boeih a venawh ami awm awm a myihna awm nyng. <sup>23</sup> Awithang leek zoseennaak awh ka paa thainaak aham, vemyihkhqi boeih ve sai nyng.

<sup>24</sup> Dawng taaqunaak awh dawng boeih hlai uhy, thlang pynoet doeng ing ni kutdo a huh hy tice am nami sim nawh nu? Kutdo nami huhnaak thai aham dawng lah uh. <sup>25</sup> Taaqunaak awh ak paa ingtaw thalawhnaak ing amik tha lo ngah ngah uhy. Cekkhqi ing amak kyi poe hly kutdo huh aham cemyih tluk na amik tha lo uhy; cehlai ningnih ingtaw kumqui dyna ak cak boei lumyk ce huh aham bi ni bi uhy. <sup>26</sup> Cedawngawh cainaak amak awm thlang amyihna haiben na am dawng nyng; zilh hqawng ak hyp amyihna am hyp nyng. <sup>27</sup> Cemyihna, thlang a venawh awithang leek kak khypy coengawh kutdo huh ham amak kawihna am ka awmnaak ham kamah a pum ve vyk nyng saw noengnaak na ta nyng.

## 10

### *Israel Ak Khuilam*

<sup>1</sup> Koeinaakhqi, pakdamkhqi ing myi ak kaiawh tuicunli ami na kat ce a sim kaana nami awm ham amni ngaih khqi nyng. <sup>2</sup> Cekkhqi boeih ing Mosi awh myi ing tuicunli awh baptisma hu uhy. <sup>3</sup> Myihla buh pynoet ce vel qip unawh, <sup>4</sup> myihla tui pynoet ce a na aw qip uhy; a mingmih a hu awh ak bat myihla lungnu awhkawng tui ce aw uhy,

cawhkaw lungnu ce Khrih ni. <sup>5</sup> Cehlai thlang ak kuum ak khanawh Khawsa ak kaw am law adawngawh qamkoh khuiawh thi boeih uhy.

<sup>6</sup> A mingmih ing ami sai them che aw h kawlung amni taaknaak ahamna ni toek hly kawi na awm law hy. <sup>7</sup> Thlang pynoet ing myiqawl ami bawk amyihna nangmih khqing koeh baw law lawt uh; “Thlangkhqi ing awk a ai aham ngawi unawh laam aham dyi uhy,” tinawh qee hyt amyihna. <sup>8</sup> Cekkhqi ak khuiawh thlang vang ing nupa thawlhnaak ami sai dawngawh khawngghi hypoet aw h thlang thongkul thongthum ami thih amyihna, ningnih ing nupa thawlhnaak koeh sai u sih. <sup>9</sup> Thlangvang ing Bawipa ami noek ami dak dawngawh – khqui ing cuk khqi nawh ami thih boeih amyihna – ningnih ing Bawipa ve noek a dak aham am awm hy. <sup>10</sup> A mingmih anglakawhkaw thlangvang ing ami saibi a dawngawh – khan ceityih ing a thih sak khqi boeih amyihna, ningnih taw koeh saibi u sih.

<sup>11</sup> Ningmih ing ni toek aham vemyih khqi ve ana awm nawh a tym a pha lawh ning ngaih ni taaknaak aham qeena ak awm ni. <sup>12</sup> Cedawngawh, ak cak cana dyi nyng, tinawh ak poek nang ing, am nang tluuknaak aham ngaihta lah! <sup>13</sup> Thlanghqing a venawh amak law khawi sykzoeknaak ce nangmih a venawh am law hy. Khawsa taw ypawm hy; anih ing am nang yh noeng sykzoeknaak ce nak khanawh am pha law sak kaw. Sykzoeknaak hu bai tik seiawm, sykzoeknaak ak kaiawh nang dyihnaak thai a hamna anih ing lam qoek a bah law kaw.

### *Myiqawl Bawknaak Buh An*

<sup>14</sup> Cedawngawh, ka lungnaak ka pyikhqi, myiqawl bawknaak ce cen taak uh. <sup>15</sup> Thlakcyikhqi venawh ni awi kak kqawn law hy; kak kqawn ve na mimah ing hqimhqa

lah uh. <sup>16</sup> Zoseennaak boet ningnih ing ni zeelnaak ve Khrih a thi ni qupnaak pyi am nu? Phaihpi ning thek uh ve Khrih a pum ni qupnaak pyi am nu? <sup>17</sup> Ningnih thlang khawzah ve phaipi cunoet, pum pynoet na nik awm ni; ni cu boeih na phaipi cunoet doeng ni ni quum haih uh.

<sup>18</sup> Israel thlangkhqi ce poek lah uh bulnaak awhkaw buh ak aikhqi taw bawkthang am qup haih lawt unawh aw? <sup>19</sup> Cawhtaw kai ing myiqawl a venawh bulnaak awh ami pek qup pyi ham ka ti nawh nu? Am ni, <sup>20</sup> lukih thlangkhqi ing bulnaak ami sai taw Khawsa venawh ami sai am nawh; qaai a venawh ni ami sai, nangmih ing qaai mi naming pha qu am ni ngaih pyi khqi nyng. <sup>21</sup> Bawipa a boet ingkaw qaai a boet am aw haih thai kawm uk ti; Bawipa ak caboei ingkaw qai ak caboei am veel haih thai bai kawm uk ti. <sup>22</sup> Bawipa ve tlaiseet sak ham cai uhyk ti my? Anih anglakawh ningnih nik tha awm khqoet nawh nu?

### *Khrihca Zeih Ham Kawi*

<sup>23</sup> Ik-oeih boeih sai ciimcaih hy, cehlai ik-oeih boeih sai am leek hy. Ik-oeih boeih sai ciimcaih hy, cehlai ik-oeih boeih sai ing thlang am tlaih vawng hy. <sup>24</sup> Cedawngawh u awm amah a leeknaak hly doeng a sui kana thlang chang a leeknaak hly sui seh nyng. <sup>25</sup> Kawlung khuiawh doetnaak a taak qee kaana meh a mi zawih ce ai mai, <sup>26</sup> ikawtih, khawmdek ingkaw ak khuiawh ak awm boeih ve Bawipa koe ni. <sup>27</sup> Amak cangnaak thlang ing buh ai na nik khy nawh ceh aham na ngaih awhtaw, kawlung khuiawh doetnaak a taak qee kaana na haiawh a toen law ce ai mai. <sup>28</sup> Cehlai u ingawm, “Vawhkaw buh a an ve bulnaak buh a an ni,” a ti awhtaw ak kqawn lawkung mi kawlung a caihnaak aham koeh ai voel, <sup>29</sup> nang ak kawlung ap kqawn ngaih na nyng, ak kqawn lawkung ak kawlung ni kak kqawn ngaihnaak hy. Ikaw ham nu ka ngaihdingnaak

ce thlang ak poeknaak ing awi a deng kaw? <sup>30</sup> Ymnaak ing buh veel nawh Khawsa venawh zeelnaak awi kak kqawn awhtaw, kaw tinawh nu coet ak kap na ka awm kaw? <sup>31</sup> Cedawngawh na awk na ainaak ingkaw them na sainaak hoei awh, Khawsa a boeihmangnaak na sai lah. <sup>32</sup> Thlang ang bahnaak aham ik-oeih koeh sai law uh, Juda awm, Greek awm Khawsa ak thlangboel awm – <sup>33</sup> ik-oeih a soep a hoei awh thlang boeih ak kawngaih sai aham kak tha ka lawh lawt amyihna nangmih ing namik tha lo lawt lah uh. Kamah a leeknaak doeng ce am sui nying saw hulna ami awm thainaak aham thlang khawzah a leeknaak ni ka sui hy.

## 11

<sup>1</sup> Kai ing Khrih ka toek amyihna nangmih ing kai ve ni toek lawt lah uh.

### *Lumyk Kawng Awiiyn*

<sup>2</sup> Ik-oeih soepkep awh kai ni sim unawh, ka cawngpyinaak namim tu loet adawngawh ni ym khqi nying. <sup>3</sup> Cehlai pakhqi boeih a lu taw Khrih na awm hy, nu a lu taw pa na awm nawh, Khrih a lu taw Khawsa na awm hy tice sim sak ahamni ngaih khqi nying. <sup>4</sup> Pa ing a lu a sing doena cykcah nawh awi ak kqawn awhtaw amah a lu chah ak phiyih ak pe ni. <sup>5</sup> Cehlai nu ing a lu a sing kaana cykcah nawh awi ak kqawn awhtaw amah a lu chah ak pena awm nawh; lusam a voh ing myih hy. <sup>6</sup> Nu ing a lu ama sing awhtaw a lusam ce voh seh; Cehlai lu voh ce chahqai na ak poek awhtaw a lu ce sing seh nying.

<sup>7</sup> Pa taw Khawsa myi sam ingkaw a boeimangnaak na a awm adawngawh a lu a sing hly qoe am ni; nu taw pa a kyihcahnaak ni. <sup>8</sup> Ikawtih nu awhkawng pa ve am law hy, cehlai nu taw pa awhkawng ak law ni; <sup>9</sup> nu aham pa ve saina am awm nawh, nu ce pa aham saina ak awm ni. <sup>10</sup> Ve

akawng ingkaw khan ceityihkhqi akawng awh ve, nu ing a lu ak khanawh saithainaak hatnaak a taak aham awm hy. <sup>11</sup> Cehlai Bawipa awh nu ve pa kana am awm thai nawh, pa awm nu kana am awm thai lawt hy. <sup>12</sup> Ikawtih nu ce pa awhkawng law nawh, pa awm nu awhkawng thang lawt hy. Cehlai ik-oeih boeih ve Khawsa awhkawng ak cawn boeih ni.

<sup>13</sup> Na mimah ing poek lah uh: Nu ing lu sing kana Khawsa venawh ak cykcah ce ak nep nu? <sup>14</sup> Khawmdek khawsaknaak qoe awh mah pa ing a lusam ak sai na am hlyn mantaw chahqai na awm nawh, <sup>15</sup> nu ing a lusam ak sai soeih na a taak awhtaw a daawnaak na awm hy; a lusam taw a dah qunaak na a pek ni. <sup>16</sup> Cehlai ak oelh a awm awh awm ningnih venawh khawsak am ta unyng, Khawsa a thlangboelkhqi ingawm am ta uhy.

### *Bawipa Mybuh*

<sup>17</sup> Cehlai ve ak awi ka nik kqawn peek khqi coming am nim kyihcah khqi thai nyng, nami leeknaak hly kawina am nawh, nami seetnaak hly khqoet kawina naming cun adawngawh. <sup>18</sup> Lammacykawh kang zaak taw, thlangboel kutoet na cun aham nami law awh, naming lakawh phek bonaak ce awm hy tinawh za nyng, cang awm cangna nyng. <sup>19</sup> Naming lakawh a tak ang dangnaak thai ham, naming lakawh ap cangsuinaak awm ak awm hly qoe ni. <sup>20</sup> Naming cun awh Bawipa mybuh ak ai na am kawih uhyk ti, <sup>21</sup> thlang boeih ing nami mybuh ce lammaa na ai hoeih hoeih uhyk ti; cawh ce thlang pynoet ak phoen cawi nawh, thlang pynoet ing qui hy. <sup>22</sup> Ikawmyihna, nami awk ainaak aham im am nami ta nawh nu? Khawsa a thlangboel aw nami thekha naak, am awhtaw amak takhqi nami the kha naak awh nu? Ve a dawngawh ka nim kyih hlyk khqi nawh nu? Amnim kyih hlyk khqi qoe nyng!



<sup>23</sup> Ikawtih Bawipa venawh kawng ka huh veni ka nik kqawn law peek khqi petoe hy: Bawipa Jesu ing, a mim tu hly am than awh, phaihpi lo nawh, <sup>24</sup> zeelawi ak kqawn coengawh, thek nawh, “**Ve ve nangmih aham ka peek ka sa ni; kai nami ni simnaak poe aham sai law uh,**” tinak khqi hy. <sup>25</sup> Cemyih koep na, phaihpi ami ai coengawh boet ce lo bai nawh, “**Ve ak boet taw ka thi awhkaw awikam thai ni; nami ni simnaak poe aham ve ve sai law uh,**” tinak khqi hy. <sup>26</sup> Ikawtih vawhkaw phaihpi ai unawh boet nami awk a hoei awh, a law tlaih hlan dy awh Bawipa a thihnaak ce namik khypyi na awm hy.

<sup>27</sup> Cedawngawh, u awm Bawipa a phaihpi ingkaw boet ce kawna a sui kaana ai nawh ak aw taw Bawipa a pum ingkaw thi awh thawlhnaak ak sai ak thlang na awm hy. <sup>28</sup> U ingawm phaihpi ingkaw boet ce a awk a ai hlanawh ak nep cana poek qu seh. <sup>29</sup> U ingawm Bawipa a pum ak leekna ak poek qu kaana a awk a ai awhtaw ak khanawh awidengnaak ce pha kaw. <sup>30</sup> Cawh ni naming lakawh tlo unawh ami mu hy, thlang vang ingtaw thi uhy ce. <sup>31</sup> Nimah ingkaw nimah lamma na nik poek qu hqeet awhtaw awidengnaak amni hu kaw. <sup>32</sup> Bawipa ing awi a ni deng khqi awh khawmdek ingqawi thawlh sak haihna am ni awm naak a hamna Bawipa a toelna ni awm uhy.

<sup>33</sup> Cedawngawh Koeinaakhqi, awk a ai aham nami law awh, qeh qu cang uh. <sup>34</sup> U awm ak phoen a cawih awhtaw, pynoet na naming cun awh awidengnaak ama huhnaak aham, im awh a ai aham awm hy. Kai ka law awh awi nik kqawn law pek khqi tlaih bit kawng nyng.

## 12

### *Myihla Kutdo Thempeek*

<sup>1</sup> Koeinaakhqi, myihla ben them peek ve a sim kaana nami awm ham amni ngaih nak khqi nyng. <sup>2</sup> Maana

lukih na nami awm awh ikawmyih na awm a ngaihnaak amyihna, ce myiqawl awi amak takhqi benna ceh pyi na awm uhyk ti sim uhyk ti. <sup>3</sup> Cedawngawh ka nik kqawn peek khqi, u awm Khawsa myihla ing awi ak kqawn ingtaw, “Jesu taw khawsii zawk seh,” am ti uhy, u ingawm Ciim Myihla ak coming kataw, “Jesu taw Boei ni,” am ti thai hy. <sup>4</sup> Them pek ak chang chang awm hlai hy, Myihla taw pynoet ni. <sup>5</sup> Bibinaak ak chang chang awm hlai hy, Bawipa taw pynoet ni. <sup>6</sup> Bibinaak ak chang chang awm hlai hy, Khawsa ing ni thlang boeih awh bi a bi hy.

<sup>7</sup> Hawihkhaangnaak a hamna Myihla simsaknaak ce thlang boeih a venawh pek na awm hy. <sup>8</sup> Thlang pynoet a venawh Myihla ing cyihnaak awithang pe nawh, ak chang a venawh Myihla ing awithang simnaak pe bai hy. <sup>9</sup> Thlak chang pynoet a venawh Myihla awh cangnaak ce pe nawh, thlang pynoet a venawh thlak tlo qoei sak thainaak pe hy. <sup>10</sup> Thlang pynoet a venawh kawpoek kyi thaawmnaak pe nawh, pynoet a venawh awithang khypyinaak pe hy. Pynoet a venawh myihlakhqi hqimhqa thainaak pe nawh, ak chang pynoet a venawh awi ak chang chang pau thainaak pehy. Ak chang pynoet a ven bai awh ce am sim awi zaaksim thainaak pe hy. <sup>11</sup> Cehlai vekkhi boeih ve Myihla pynoet ing thlang boeih a venawh ak ngaihnaak amyihna teei nawh bibi hy.

### *Pumqaw Pynoet Ni*

<sup>12</sup> Pum ve pynoet doeng hlai ni a baai khawzah awm hy; cawhkaw a baai khawzah ing pum pynoet coeng sak hy. Cemyih nani Khrih awm a awm hy. <sup>13</sup> Ikawtih ningnih boeih ve Myihla pynoet ing ni pumoet na awm a hamna baptisma ani peek khqi boeih hy; Juda awm Greek awm tamnaa awm ak tamnaa am awm, awk hly kawi Myihla pynoet doeng ni ningnih a venawh a ni peek khqi hy.

<sup>14</sup> Pum ve pynoet doengna am sai nawh a baai khawzah nani a sai. <sup>15</sup> Khaw ing, “Kai taw kut na am awm nyng saw pum awh am paa nyng,” a ti mantaw, cemyihna a ti ak camawh pum awh a paa kaana am awm thai hy. <sup>16</sup> Haa ing, “Kai taw mik na am awm nyng saw pum awh am paa thai nyng,” a ti mantaw, cemyihna a ti ak camawh pum awh a paa kaana am awm thai hy. <sup>17</sup> Pum ve mik hqoeng na a awm mantaw, ikaw ing nu awi ang zaak kaw? Pum ve haa hqoeng na a awm mantaw, ikaw ing nu baw ang zaak bai kaw? <sup>18</sup> Cehlai Khawsa ing pum awhkaw a baaikhqi boeih ce amah ing a ngaihnaak a hun awh ta boeih hy. <sup>19</sup> Pum a baaikhqi ve pynoet na a awm boeih mantaw pum ve hana nu a awm kaw? <sup>20</sup> Cedawngawh, a pang kqeng soeih hlai hy, pum taw pynoet ni. <sup>21</sup> Mik ing kut a venawh, Amni ngoe nyng! am tina thai hy. Lu ing khaw a venawh, “Amni ngoe nyng!” am tina thai bai hy. <sup>22</sup> Cemyihna pum a baai tha amak awn amyihna ak dangkhqi ve phu ak ta boeihkhqi na awm uhy. <sup>23</sup> Cekcoengawh zoeksang kawina am ning ngaih pum a baaikhqi ce, ce qoe ce huhhly kawina awm uhy; huh sitna ak awm ni baaikhqi ing zoeksangnaak khawzah hu uhy. <sup>24</sup> Ni baai huhlhy ak cukhqi ingtaw cemyihna sai am ngaih hy. Pum-awh ve hqeengnaak qoe qoe am awm nawh, a baaikhqi ing ang myih qipna amik bawng qunaak qip thai a hamna <sup>25</sup> Khawsa ing dawnaak amak ta a baai ce zoeksang khqoet nawh, pum ve pumoetna a sai ni. <sup>26</sup> Cemyihna a baai pynoet ing ang yh awhtaw a baai changkhqi boeih ingawm yh lawt unawh, a baai pynoet zoeksangna a awm awhtaw a baaikhqi boeih ing ym pyi uhy.

<sup>27</sup> Nangmih taw Khrih a pumna awm unawh, a baaikhqi boeihna awm uhyk ti. <sup>28</sup> Khawsa ing thlangvang ce thlangboel khuiawh ta nawh, a pynoetnaak awh ceityih na, a pakkhihnaak awh awihkqawnkung na, ak pakthum-

naak awh cawngpyikung na ta hy; cekcoengawh kawpoek saithainaak, ak tlo qoei saknaak, awi a phyn phyn na awikqawn thainaak them pekkhqi ce awm bai hy. <sup>29</sup> Ami cu boeih ceityih na awm boeih unawh nu? Ami cu boeih tawnggha na awm boeih unawh nu? Ami cu boeih cawngpyikung na awm boeih unawh nu? Ami cu boeih ing kawpoek kyi them sai boeih unawh nu? <sup>30</sup> Ami cu boeih ing thlaktlo qoei sai thai boeih unawh nu? Ami cu boeih ing awi kqawncaihnaak thai ta boeih unawh nu? <sup>31</sup> Cehlai thempeek ak bau soeihkhqi ce ngaih soeih kawm uk ti. Cawhce lamleek soeih nim huh khqi kawng nyng. soeih lah uh.

## 13

### *Lungnaak*

<sup>1</sup> Thlanghqing awi ingkaw khan thlang awina awikqawn nyng seiawm, lungnaak am ka taak awhtaw maawng ang qeeng ingkaw tlaklaak ang qeeng mai amyihna ni a awm hly. <sup>2</sup> Tawnggha awi kqawn thainaak ta nawh ang awihyp ingkaw simthainaak boeih ta nyng seiawm, tlang thoeihnaak thai dy cangnaak ak soep ta nyng seiawm, lungnaak am ka taak awhtaw ikaw phu am ta hy. <sup>3</sup> Ka khawhthemkhqi boeih khawdeng hahqahkhqi venawh pe nawh ka pum ve mai awh uih sak ham dyna pe qu mai nyng seiawm, lungnaak am ka taak awhtaw, ka hamna ikaw phu am ta hy.

<sup>4</sup> Lungnaak ingtaw yh thai nawh, qeennaak tahy. Lungnaak ing ytnaak am ta nawh, am hoel qu nawh, am oek qu hy. <sup>5</sup> Am thin am se nawh, am kamvaa hy. Ak kaw am so sak nawh, thawlhnaak lam am poek hy. <sup>6</sup> Lungnaak ingtaw them che awh am zeel nawh, cehlai awitak ce ym hy. <sup>7</sup> A soep hoeiawh yh thai nawh, a soep awh cangnaak

ta nawh, a soep awh ngaih-uunaak ta nawh, a dytnaak dyna yh thai hy.

<sup>8</sup> Lungnaak ve ityk awh awm am dyt kaw. Cehlai tawnghak awi awm seiawm dyt kaw, amsim awi pau na awm seiawm dyt kaw, simnaak awm seiawm dyt kaw. <sup>9</sup> Ningmih ing a vang a phal ni ni sim unawh a vang a phal doeng ni nik khypyu uhy, <sup>10</sup> cehlai soepnaak a nyn ce a pha law awh ama soepnaakkhqi boeih ce qeng hawh kaw. <sup>11</sup> Naasen na ka awm awh, naasen amyihna paunying, naasen amyihna poek nyng, naasen amyihna zasim nyng. Cehlai ka pacawng awhtaw, naasen poeknaakkhqi boeih cehta nyng. <sup>12</sup> Tuh hlalang awh ni huh amyihna ak caih na amni hu uhy; cawhtaw ni haai ingkaw ni hai ning hu qu hawh kaw. Tuh ve a vang a phal doeng ni ka sim hy; ce cawhtaw tuh ak nepna ni sim amyihna, ak nepna sim hawh kawng nyng.

<sup>13</sup> Ve pakthum tloek ve awm hy: vetloek taw cangnaak, ngaih-unaak ingkaw lungnaak ve ni. Cehlai ve tloek ak khuiawh ak bau soeih taw lungnaak ni.

## 14

### *Awiphawngnaak Ingkaw Amsim Awi Paunaak*

<sup>1</sup> Lungnaak ve hquut unawh taw myihla ben kutdo ve ngaih soeih lah uh, kutdo ak khuiawh awikqawnaak ve ngaih khqoet lah uh. <sup>2</sup> Ikawtih amsim awi na ak pau ing thlang a venawh am pau nawh Khawsa venawh ni a pau hy. Amsim awina awihkqawn ing thlanghqing venawh awi ak kqawna am awm nawh, Khawsa venawh ak kqawn ni, u ingawm ak awihkqawn ce am zasim uhy; cehlai myihla ing awihyp ak kqawn ni. <sup>3</sup> Cehlai awi ak kqawn ingtaw thlang ak thaawmnaak, thapeeknaak ingkaw ngaihdngnaak aham awi kqawn pehy. <sup>4</sup> Amsim awi ak pau ing amah doeng tlaihvwng nawh, awihkqawnkung ingtaw

thlangboel tlaihvwang hy. <sup>5</sup> Amsim awi nami pau boeih aham ngaih hlai nyng, cehlai awi namik kqawn a hamna ni ngaih pyi khqi bet nyng. Amsim awi ak pau ing thlangboel a hawihkhangnaak aham kqawn caihnaak ama taak awhtaw, amsim awi pau anglakawh awi ak kqawn taw leek bet hy.

<sup>6</sup> Koeinaakhqi, nangmih a venawh law nawh amsim awina kqawn nawh, simsaknaak mai aw, simnaak mai aw, awikqawwnaak mai aw, cawngpyinaak mai aw nami venawh am kak kqawn mantaw nangmih hamna ikaw phu a taak kaw? <sup>7</sup> Ik-oeih hqingnaak amak awm, ak qeng thai, khqung maiaw, tingtoeng mai aw thlang ing a oei awm kaana a tum sawhqat mantaw u ing ang zak thai kaw? <sup>8</sup> Uut awm a lawng a lam na ama qeng mantaw, qaal tuk aham u nu ak hlah kaw? <sup>9</sup> Cemyih nani nangmih awm nami awm hly. Nam lai ing zaksim kaw? Zilh aw hly? <sup>10</sup> Khawmdék khan aw hly? <sup>11</sup> Thlang ing awi ak kqawn ce am kang zaksim mantaw, kai taw anih aham thlanglang na awm kawng nyng saw, anih awm kai aham thlanglang na awm kaw. <sup>12</sup> Cemyihna ce nangmih awm Myihla ben thempeek ce huh aham nami ngaih adawngawh, thlangboel hamna a hawihkhang naak hly ben thempeek ce ngaih lah uh.

<sup>13</sup> Ve a dawngawh amsim awi ak pau ing ak kqawn-caihnaak thai a hamna cykcah seh nyng. <sup>14</sup> Amsim awi na kak cykcah mantaw kang myihla ni ak cykcah hy, cehlai ka simnaak ing am hawihkhang hy. <sup>15</sup> Cawhtaw ikawmyihna nu ka ti hly? Myihla ing cykcah kawng nyng saw, kak kawlung ingawm cykcah kawng; myihla ing laa sa kawng nyng saw, kawlung ingawm laa sa kawng. <sup>16</sup> Myihla ing Khawsa namim kyihcah mantaw

nami venawh ak awm amak zasimkhqi ing ikawmyihnanu nangmih a zeelnaak awi kqawwnaak awh ce, “Amen” ami ti thai kaw? <sup>17</sup> Nangmih ingtaw zeelnaak awi kqawn hly pai hlai uhyk ti, thlakchang aham hawihkhng naak am awm hy.

<sup>18</sup> Nangmih boeih anglakawh amsim awi khawzah ngaina ka pau dawngawh Khawsa kyihcah nyng. <sup>19</sup> Cehlai thlangboel ak khuiawh amsim awi thonghqa kqawn anglakawh thlang cukkiknaak aham thlang ing ang zak-sim awi lung nga ni kak kqawn hly lat hy. <sup>20</sup> Koeinaakhqi, kawpoeknaak benawh koeh nasen voel uh; cehlai thawlh sainaak awhtaw nasen unawh, kawpoeknaak awhtaw hqamca law uh. <sup>21</sup> Anaa awi awh, “Thlak chang awi ak paukhqi ingkaw qapchang thlangkhqi a hui am lai hawnaak ing, ve thlangkhqi venawh awi kqawn kawng, cawh pateng awm kak awi ve am ngai kawm uh,” tinawh Bawipa ing kqawn hy.

<sup>22</sup> Amsim awi vetaw, ak cangnaak thlangkhqi ham am nawh amak cangnaak thlangkhqi aham hatnaak ni; cehlai awiphawng taw amak cangnaak thlangkhqi aham am nawh ak cangnaak thlangkhqi ham ni. <sup>23</sup> Thlangboelkhqi pynoet na a ming cun awh amsim awi na ami pau boeih mantaw, cawhkaw ak awm amsim awi na amak pau thlang, am awhtaw amak cangnaak thlangkhqi ing, nangmih ve ami cyih am awm voel hy, amni tina hlyk khqi nawh nu? <sup>24</sup> Cehlai nangmih ing awi namik kqawn awh, amsim awi amak zasim ingkaw amak cangnaak thlang ce a law mantaw, anih ce nangmih ing ak nepna namik kqawn peeknaak ak coming thlakthawlh na awm nyng, tice sim kaw, <sup>25</sup> ang hyp kawlung poeknaakkhqi boeih ce dang sak na awm kaw. Cawhtaw anih ing khuk sym doena Khawsa ce baww kaw, “Nangmih anglakawh Khawsa awm tang tang hy!” ti kaw.

*A Lawng A Im Na Khawsa Bawk*

<sup>26</sup> Cawhtaw Koeinaakhqi ikawmyihna nu ni ti lah voei uh? Kutnoet na naming cun law aw, laa sak ham, am awhtaw nyhtahnaak awi aw, awiphawng ham aw, amsim awi pau ham aw, am awhtaw kqawncaih ham aw ta qip uhyk ti. Vemyihkhqi boeih ve thlangboel thaawmnaak aham nami sai aham awm hy. <sup>27</sup> Amsim awi ak pau a awm awhtaw, thlang pakkhih pakthum ce pyoet na pau kawm usaw, cawh thlang pyoet ing ak kqawn caih aham awm hy. <sup>28</sup> Ak kqawn, caihkung ama awm awhtaw, thlangboel anglakawh amsim awi ak pau ce awm dym seitaw amah ingkaw Khawsa anglak law aw, pau seh nyng.

<sup>29</sup> Thlang pakkhih pakthum ing awi phawng kawmsaw, thlak chang ing cawhkaw awi ce ak nepna a nai a nawng aham awm hy. <sup>30</sup> Ak ngawi thlang a venawh phawng hly kawi awi a pha awhtaw, awi ak kqawn lamma ce ang dym aham awm hy. <sup>31</sup> Thlang boeih cukkik na awm nawh thaawmnaak a mi huh thainaak aham, pyoet qip ing awikqawn thai uhyk ti. <sup>32</sup> Awi ak phawngkungkhqi ang myihla taw awi phawngkung a hquinaak khuiawh ni a awm. <sup>33</sup> Ikawtih Khawsa taw kqonaak Khawsa am nawh qoepnaak Khawsa ni. Thlakciimkhqi cunnaak thlangboel khuiawh a awm amyihna. <sup>34</sup> Nukhqi ing awi kqawn kaana ami awm dym aham awm hy. A mingmih aham awi kqawn thainaak am awm hy. Anaa awi ing ak kqawn amyihna awi ngainaak ing ami awm aham awm hy. <sup>35</sup> Ik-oeih akawng sim aham ami ngaih awhtaw, im na ami vaakhqi ce doet u seh; kawtih nu ing thlangboel khuiawh awi ak kqawn ve chahqi na awm hy.

<sup>36</sup> Nangmih a venawh nu Khawsak awi ve a law ma? Am awhtaw nangmih doeng nu ak pha ma na nami awm uh? <sup>37</sup> U ingawm tawngaha am awhtaw myihla kutdo ak hu na ang ngai qu awhtaw, kai ing nangmih a venawh ka qee law



awi ve Bawipa ak awipeek ni ti sim seh. <sup>38</sup> Cehlai Ikawna ama sui awhtaw anih awm Ikawna am sui lawt kaw.

<sup>39</sup> Cedawngawh, koeinaakhqi, awiphawng ve ngaih bet uh, Cehlai amsim awi pau awm koeh kham law uh. <sup>40</sup> Ik-oeih soepkep ve a lawng a im amyihna ang qoep cana sai aham awm hy.

## 15

### *Khrih Thawhtlaihnaak Kawng*

<sup>1</sup> Koeinaakhqi, nangmih a venawh kak khy law pyi awithang leek, nangmih ing hu u tiksaw dyih hun na nami taak ce sim sak tlaih aham ni ngaihnaak khqi nyng.

<sup>2</sup> Nangmih a venawh kak khy law pyi awi ce ak cak cana na mim tu awhtaw, ce awithang leek ak coming nangmih taw hul na awm uhyk ti. Cemyih am mantaw a hqawng a hqap ni namik cangnaak hly.

<sup>3</sup> Ikawtih kai ing ka huh ce lamma cyk na nangmih a venawh awipui na ning zaak sak khqi nyng. Cakciim ing ak kqawnaak amyihna Khrih taw ningnih a thawlhnaak aw h thi nawh, <sup>4</sup> phyi aw h pup uhy, Cakciim ing ak kqawnaak amyihna am thum nyn aw h tho tlaih hy, <sup>5</sup> cekcoengawh Piter ingkaw thlanghqa hlaihih a venawh dang pek khqi hy. <sup>6</sup> Cekcoengawh, ce a tym aw h koeinaa thlang zanga a venawh dang pek khqi bai hy. Cekkhi ak khuiawh thlangvang taw hqing hyn unawh, thlang vang bai taw thi hawh uhy. <sup>7</sup> Cekcoengawh Jacob a venawh dang pe nawh, ceityihkhqi venawh awm dang pek khqi bai hy, <sup>8</sup> a hukhit na a tym canawh amak thang, kai a venawh awm dang law lawt hy.

<sup>9</sup> Kai ve ceityihkhqi ak khuiawh ak zawi soeih na awm nyng saw Khawsa a thlangboel ce ka thekhanaak dawngawh ceityih tinawh khy ham awm am kawih nyng.

<sup>10</sup> Cehlai Khawsa qeennaak ak coming kai taw kai na awm

nyng, ka venawh a ni peek am qeennaak ve awm a hqawng na am awm hy. A mingmih anglakawh khawzah ngai bibi nyng. Cehlai kai amni, kai a venawh ak awm Khawsam qeennaak ak coming ni. <sup>11</sup> Kai ingawm a mingmih ingawm, ve ni ka mik khypyï nawh, veni ka mik cangnaak hy.

### *Thlakdyng Thawhtlaihnaak*

<sup>12</sup> Khrih taw thihnaak awhkawng tho tlaih hy tice khypyï na a awm hawh awhtaw, ikawmyihna nangmih anglakawhkaw thlang pynoet ing thlakthi thawh tlaihnaak am awm hy, nami ti uh? <sup>13</sup> Thlakthi thawh tlaihnaak ama awm mantaw, Khrih awm thihnaak awhkawng am tho voel lawt ti kaw. <sup>14</sup> Khrih ce thihnaak awhkawng ama thawh tlaih mantaw, kaimih ing awi ka mik khypyï ve a hqawng na awm kawmsaw nangmih ak cangnaak awm a hqawng na awm kaw. <sup>15</sup> Cedoeng kaana, Khawsa ing Khrih ce thihnaak awhkawng thawh tlaih hy tinawh ka mik khypyï adawngawh kaimih ve Khawsa ak simpyikung zap na awm kawng unyng. Thlakthikhqi a mami thawh voel mai mantaw Khrih awm thihnaak awhkawng am tho voel hy, ti aham awm hy. <sup>16</sup> Thlakthikhqi a mami thawh voel mantaw, Khrih awm thihnaak awhkawng am tho voel hy. <sup>17</sup> Khrih ce thihnaak awhkawng ama thawh voel awhtaw, nangmih ak cangnaak ce kawna awm amang coeng coengawh; nangmih taw thawlhnaak awh awm hyn uhyk ti. <sup>18</sup> Cedawngawh Khrih awh amik ipkhqi awm qeng hawh kawm uh. <sup>19</sup> Ve khawmdek hqingnaak ham doeng Khrih awh ngaih-unaak ni taak mantaw thlang boeih boeih anglakawh qeen ak kap soeih na ni awm kawm uh.

<sup>20</sup> Cehlai Khrih taw thihnaak awhkawng a thawh tang tang hawh dawngawh, anih ce ak ipkhqi aham thaihcyk na awm hy. <sup>21</sup> Ikawtih thihnaak taw thlang pynoet

awhkawng law nawh, thawh tlaihnaak awm thlang pyoet awhkawng law lawt hy. <sup>22</sup> Adam awh thlang boeih a thih amyihna, Khrih awh thlang boeih hqing lawt hy. <sup>23</sup> Thaihcyk na ak awm Khrih ce a law awh, amah a koena ak awmkhqi boeih taw amah a tym a pha awh tho tlaih kawm uh. <sup>24</sup> Cawhtaw a tym a dytnaak ce awm hawh kaw, uknaakkhqi, saithainaakkhqi ingkaw thaawmnaak khqi ce a hqe coeng awhtaw qam ce Pa Khawsa venawh pe kaw. <sup>25</sup> A qaalkhqi boeih boeih a khawk kaina a taak hlan dy taw boeimangnaak ce ta kaw. <sup>26</sup> A hukhit na a him hly kawi qaal taw thihnaak veni. <sup>27</sup> Ikawtih amah ing, ti awh ik-oeih boeih boeih Khrih a khawk kaina ak taak peekkung, khawsa amah am paa hy tice ciim hy. <sup>28</sup> Vemyihkhqi a sai coengawh, Khawsa taw soepkep awh soepkep na a awmnaak thai aham Capa ce ak kaiawh ik-oeih boeih ak taak peekkung a venawh peek na awm kaw.

<sup>29</sup> Thawhtlaihnaak ama awm mantaw, thlakthikhqi aham baptisma ak pekhqi ce ikawmyihna a awmnaak kaw? Thlakthikhqi ce ama thawh tlaih mantaw, ikaw ham cekkhqi aham baptisma huh a ngaih? <sup>30</sup> Ningmih ingtaw, ikaw ham myngawi awh kqih awm khuikha ni huh uh? <sup>31</sup> Myngawi awh kai taw thi poepa nyng – kak kqawn ngaihnaak taw Koeinaakhqi – nangmih ak khanawh Khrih Jesu ningnih a Bawipa awh zoeksang na awm poepa nyng. <sup>32</sup> Thlanghqing mi ka ming tuk qu mantaw, ikaw hawihkhangnaak ka huh kaw? Thlakthi a mami thawh voel awhtaw, “Khawngawi awh thih aham ni awm hawh dawngawh, aw unawh taw ni ai mai thaw voei uh”

<sup>33</sup> Thlang ing ni sawi khqi thawlh hau kaw: Thlak leek am ing khawboek leek hqe hy ka ti koe noek” <sup>34</sup> Nami awm ham ang kawih vaih amyihna hu na voei tlaih unawh taw,

koeh thawlh voel uh; Khawsa amak sim thlang vang awm uhyk ti ve - ve ve nangmih namik chahnaak bet aham kqawn law nyng.

### *Thlanghqing Thawhtlaihnaak*

<sup>35</sup> Thlang pynoet ing, Ikawmyihna thlak thi ce a thawh tlaih naak kaw? Ikawmyih a pum ing nu a mi awm kaw?" tinawh ni doet mai kaw. <sup>36</sup> Qaw hyk ti! Na saw ce ama thih maa awhtaw am hqing saw kaw. <sup>37</sup> Na saw awh a thing ce am ling pahoei hy, caang mai awm ikawmyih am ci mai awm ak ui ni a saw hy. <sup>38</sup> Khawsa ing ni amah ing ak poeknaak amyihna a thing ce ang coeng sak hy, am ci boeih awh amah a thing amyihna a thing ce coeng sak boeih hy. <sup>39</sup> Pumsa ve awm myih qu boeih hy: Thlanghqing a pumsa ak chang, qamsa a pumsa ak chang, pha ingkaw nga a pumsa ve ak chang bai ni. <sup>40</sup> Khan pumsa awm nawh dek pumsa awm awm hy; khan pumsa a boeimangnaak ak chang na awm nawh dek pumsa a boeimangnaak ak changna awm bai hy. <sup>41</sup> Khawmik a boeimangnaak ak changna awm nawh pihla ingkaw aihchi a boeimangnaak ak chang na awm hy; aihchi ingkaw aihchi a boeimangnaak awm am myih hy.

<sup>42</sup> Cemyihna ni thlakthi thawh tlaihnaak awm a awm hy. Ak thu thai pum ce saw na awm kawmsaw, amak thu thaina tho tlaih kaw; <sup>43</sup> huhsit soeihna saw na awm kawmsaw, ak boeimang soeihna tho tlaih kaw; <sup>44</sup> khawmdek pumsa na sawna awm kawmsaw, myihla pumsa na tho tlaih kaw. Khawmdek pumsa a awm amyihna, myihla pumsa awm awm hy. <sup>45</sup> Cemyihna, "Thlanghqing cyk Adam taw thlanghqing na awm hy," tinawh qee hyt amyihna awm hy; Adam hu khyng taw hqingnaak ak pekung myihla na awm hy. <sup>46</sup> Myihla pum am awm ma nawh, khawmdek pum ni a awm ma hy, cekcoengawh ni myihla

pum ce a awm hy. <sup>47</sup> Lammacyk thlanghqing taw dekvai na awm hy, thlanghqing a pakkhihnaak taw khanna kawna awm hy. <sup>48</sup> Khawmdek thlang taw, khawmdek a koena awm nawh; khan ben thlang taw, khanben thlangkhqi myihna awm uhy. <sup>49</sup> Khawmdek thlanghqing myi ni lawh lawt amyihna, khan benna kaw thlanghqing myi ce ni lo lawt kawm uh.

<sup>50</sup> Koeinaakhqi, thisa ing Khawsa qam am pang thai hy, ak thu thai ing amak thu thai ce am pang thai lawt kaw, tive nik kqawn pek khqi nyng. <sup>51</sup> Ngai lah uh, awihyp nik kqawn law pek khqi vang nyng: ningnih boeih ve amni ip kawm uh, cehlai hlengna ni awm boeih kawm uh – <sup>52</sup> cehlai ni cu boeih na ak hukhit uut tum awi ang qeng lawawh mik hqip tawk lek awh hlengna ni awm boeih kawm uh; uut taw qeng law kaw, cawhtaw thlak thikhqi ce amak thu thaina thawh sakna awm kawm uh, ningnih awm hlengna ni awm kaw. <sup>53</sup> Ikawtih ak thu thai ce amak thu thai ing singdah na awm kawmsaw, ak thi thai ce amak thi thai ing singdah na awm hawh kaw. <sup>54</sup> Ak thu thai ce amak thu thai ing singdah na awm nawh, ak thi thai ce amak thi thai ing singdah na a awm awhtaw, vawhkaw awi qee hyt na ak awm:

“Noengnaak ing thihnaak daih hawh hy,” ti awi ve soep hawh kaw.

<sup>55</sup> Aw thihnaak, na noengnaak hana nu a awm?  
Aw thihnaak, hana aw nak chy a awm?”

<sup>56</sup> Thihnaak ak chy taw thawlhnaak ni, thawlh ak thaawmnaak taw anaa awi ni. <sup>57</sup> Cehlai Khawsa venawh thangleeknaak awm seh! Ni Bawipa Jesu Khrih ak coming noengnaak ce ningnih a venawh ni pek khqi hawh hy. <sup>58</sup> Cedawngawh, ka lungnaak koeinaakhqi, ak cak na dyi

lah uh. Ikaw ingawm koeh ning tah sak khqi seh. Bawipa bi nami bi ve am zoe hy tice nami sim dawngawh, Bawipa bibi ce bi law quiqah lah uh.

## 16

### *Khawsak Thlangkhqi Caawinaak*

<sup>1</sup> Khawsak thlangkhqi caawinaak awh ve: Galatia thlangboel a venawh sai aham kak kqawn peek amyihna nangmih ingawm sai lawt lah uh. <sup>2</sup> Khawngghi khqi nyn awhkaw khawngghi lamma cyk awh, nangmih boeih ing tangka nami huh ak khuiawh kawng hoep unawh, cun uh, kai ka law awh ce tangka cawi koeh ngaih voel seh nyng. <sup>3</sup> Kai ka pha law awh ce, nangmih ing namik tyh thlang ce capat ing Jerusalem na nangmih a kutdo ce thak sak bit kawng nyng. <sup>4</sup> Kai awm ceh aham ka awm awhtaw cekkhqi mi cet haih vang nyng.

### *Paul Khawlawng Ceh Ham Cai Hy*

<sup>5</sup> Makedonia qam awhkawng nangmih a venna law kawng – ikawtih Makedonia qam awhkawng ni ka ceh hly. <sup>6</sup> Nangmih a venawh a khoeh taw awm hyn mai kawng, chikka khuiawh taw nangmih a venawh awm mai kawng nyng, cawhni nangmih ing hana ka ceh awh awm lam lak awh nami ni bawm hly thai hy. <sup>7</sup> Tuh taw nangmih huh aham ngaih hlan nyng saw nik kankhqi hun nyng: Bawipa ing tyng hy a ti awhtaw, nangmih a venawh awm hun kawng, tinawh ngaih-u nyng. <sup>8</sup> Cehlai Efisa khaw awh Pentikost nyn dy awm kawng nyng, <sup>9</sup> cawh kai aham a phu ak awm bibi thainaak aham chawh awng qu hy, cehlai kai anik oelh awm thlang khawzah awm hy. <sup>10</sup> Timote a law awhtaw, nangmih a venawh a awm awh kqihnaak ama taaknaak aham ak nepna toek law uh, anih ingawm kai

amyihna ni Bawipa bi ce a bi lawt hy. <sup>11</sup> U ingawm anih ce a do kaana awm aham am awm hy. Ka ven a pha lawnaak tlaih aham ak nepna tyi law uh. Anih ingkaw Koeinaakhqi ce kai ing a nang ngaih-u kawng. <sup>12</sup> Ni koeinaa Apollo akawng: Koeinaakhqi mi nangmih a venna ceh aham anih ce kai ing kqawn pe nyng. Tuh awhtaw ceh aham am ngaih ngai hyn hy, cehlai a hoengnaak awh law bit kaw.

### *Hukhit Awiynnaak*

<sup>13</sup> Ak nepna ngaihta uh; cangnaak awh ak cak na dyi uh; pacawng thin ak cak na awm unawh, namik tha awm sak uh. <sup>14</sup> Ik-oeih soepkep lungnaak ing sai law uh. <sup>15</sup> Stephana ipkhui khaw taw Akhaia qam khui awh ak cangnaak lamnacyk na awm uhy tice sim uhyk ti, a mingmih taw thlakciimkhqi a bibinaak awh cak uhy. Koeinaakhqi, awi ni yn khqi nyng, <sup>16</sup> a mingmih amyihna bi ak bikhqi ce bawng unawh, bibi law uh. <sup>17</sup> Stephana, Fortunata ingkaw Akhaika mi ami pha law awh ce, nangmih a voet hlauhnaak ce a mingmih ing a ni bawm khqi dawngawh zeel nyng. <sup>18</sup> A mingmih ing kai ingkaw nangmih awm ni caih sak khqi hy. Vemih ak thlangkhqi taw ym aham awm hy.

### *Hukhit Kuttunaak*

<sup>19</sup> Asia qam awhkaw thlangboelkhqi ing kut nim tu uhy. Akuila ingkaw Priskili ing Bawipa awh zeel doena kut nim tuk khqi hy, a im awh amik cun thlangboel ingawm kut nim tuk khqi hy. <sup>20</sup> Vawh amik awm koeinaakhqi boeih ing kut nim tuk khqi hy. Pynoet ingkaw pynoet ak ciimcaih mawknaak ing mawk qu lah uh. <sup>21</sup> Kai, Paul ing kamah a kut qoe ing ve kut tunaak ca ve qee law nyng. <sup>22</sup> U ingawm Bawipa ce ama lungnaak awhtaw – anih ak khanawh seetnaak awm seh. Aw Bawipa, law lah! <sup>23</sup> Bawipa Jesu am qeennaak nangmih ak khanawh awm

1 KORIN 16:24

40

1 KORIN 16:24

seh. <sup>24</sup> Khrih Jesu awh nangmih boeih boeih ni lung nak khqi nyng. Amen.



**Tuivang Holy Bible**  
The Holy Bible in the Tuivang dialect of the Matu Chin language of  
Myanmar (Burma)

Copyright © 2020 Batupei Christian Fellowship

Language: Tuivang (Chin, Matu)

Dialect: Tuivang

Copyright applies only in Myanmar. Outside Myanmar, this work is in the Public Domain.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2020-12-23

---

PDF generated using Haiola and XeLaTeX on 30 Dec 2021 from source files dated 30 Nov 2021

02ecb546-dab3-59d0-ad6b-9ceb54cb8e08